

Das acht vnd sibentzigste Capitel.

Von Maioran.

**M**aioran ist im latin vnd teutschen einträchtig/ vnd ist warm vnd trucken im andern Grad/ vnd wirt mit ein andern Latinischen Namen genant Esbrium. Ihre Blum vnd Kraut ist nützlich der Arzney. Sie werden beyde gesamlet im Sommer/ vnd im schatten getrocknet/ vnd ein jar behalten in guter krafft. Sie haben macht zu stärken/ von wegen ihres edlen Geschmacks. Zu theilen vnd verzehren auß iren Eigenschafften/ vnd auch zu reinigen. Das Puluer von irem Samen/ oder der Wein/ darinn das Kraut gesotten ist/ erwärmet den erkalten Magen/ vnd hilfft dāwen. Ire Blätter vnd Blumen gewärmet in einem Ziegel/ vnd in ein Säcklin gelegt auff wehe/ die von Kälte oder Winden bekoñen/ vertreibt das wehe. Item also auch auff das Haupt gelegt vertreibt den Fluxum Keuma genant. Item/ zu wissen/ daß die Māus gar gern essen die Wurzeln/ denn sie suchen sie gar mit fleiß.

Das neun vnd sibentzigste Capitel.

Von Melden.

**M**elden ist im latin genant Atriplex/ wirt gesehet im Hornung vnd im Mercken/ vnd darnach alle Monat/ biß in Herbst. Ir ist von nöthen in truckner zeit/ daß sie begossen werd/ aber sie darff nicht versetzt werden. Von etliche wirt sie gesäet im Decembri in feiste Acker wol gegraben/ vnd wirt besser/ denn sie dünn gesäet wirt. Sie mag allein oder mit andern Samen gesäet werden/ vnd allezeit soll man sie abschneiden/ wenn sie wider außschlegt. Der Samen bleibt gut vier Jar. Sie ist kalt im ersten/ vnd feucht im zweiten Grad/ sie nehret wenig/ denn ire Natur ist wässerig/ vnd wirt bald außgeworffen/ vnd weichet den Bauch. Gelegt auff ein hitzigs Geschwer/ es erkühlet bald. Ihr Samen reiniget/ vnd macht sehen/ davon ist er gut denen die die Gilt haben/ die geboren wirt von verstopffung der Leber. Wer des Samens zwey quintlin nimt mit Wasser vnd Honig/ bricht von jm die Cholera.



Das achtzigste Capitel.

Von Meerdisteln.

**M**eerdisteln seyn genant Eretamus/ warm vñ trucken im vierdtē Grad/ vnd wirt funden bey dem Meer/ vnd hat krafft durchdringen von behendigkeit seiner Substanz. Wider den Harnwind/ Lendenwehe/ vñ den Stein/ soll man das Kraut sieden in zimlicher groß in Saltwasser/ vnd auch Wein vnd Oele darbey/ vnd in dem sol der Siech badende sitzen biß an seinen Nabel. Mag er aber des nicht so viel haben/ so mache er ein Pflaster allein auff die Weich. Das Kraut gessen/ vnd auch der Wein/ da es inn gesotten ist/ getruncken/ macht harnen/ vnd benimpt die vor genantē Sūcht/ wirt das zum dickernmal getruncken.



Das ein vnd achtzigste Capitel.

Von Merrettich.

**M**errettich ist im Latin genant Raphanus Maior/ darumb daß er nicht Samen hat/ so pflanzet man seine Wurzeln eine ganze Scheibe/ oder halbe. Oder zerschneidet seine Wurzel zu kleinen Stücken/ vnd pflanzet die im December biß in den Meyen. Er wil loß Erdrich haben/ vñ tieff gegraben/ vñ feist als andere Kräuter/ die lange Wurzeln machen. Wenn wir wollen mache Compost von Rüben/ so brauchen wir des Merrettichs. Er ist warm vñ trucken

MM iii

cken